

四庫全書

子部

欽定四庫全書

冊府元龜卷一百四十一 宋 王欽若等 撰

帝王部

念良臣

抑外戚

尊外戚

念良臣

良臣之於君也有股肱之喻有心腹之寄故存則倚任
沒而追思此哲王之所同也漢氏而下乃有懷其勲烈
念其才德形於震悼發乎嘆喟以至申命文學頌其畫

像親枉輿駕臨其館舍或哀述其懿範或存記其讜言
稱詠發于章句賙賻越於夷等逮夫罷宴停景驚食流
涕靡涓日而發哀遙望車而增慟極云亡殄瘁之痛深
愍遺界予之嗟斯足以篤愛賢之心厚同體之義者傳
所謂聽鼓鞀琴瑟而必有所思焉其是之謂矣

漢成帝時西羌常有警帝思將帥之臣追美趙充國乃
召黃門郎揚雄即充國圖畫而頌之充國宣帝時以功
德與霍光等列畫未央宮

後漢光武時祭遵為征虜將軍屯隴下建武九年春卒於軍光武愍悼之尤甚遵喪至河南縣詔遣百官先會喪所車駕素服臨之望哭哀慟還幸城門過其車騎涕泣不能已喪禮成復親祠以太牢既葬車駕復臨其墳存見夫人室家其後會朝帝每嘆曰安得憂國奉公之臣如祭征虜者乎遵之見思若此帝數嗟嘆衛尉鉞期見帝感動對曰陛下至仁哀念祭遵不已羣臣各懷慚

懼

祭彤為太僕坐伐北匈奴逗撓下獄免嘔血死帝雅重彤方更任用聞之大驚召問其疾狀嗟嘆者良久焉

賈復與五校戰於真定大破之復傷創甚光武大驚曰我所以不令賈復別將者為其輕敵也果然失吾名將聞其婦有孕生女邪我子娶之生男邪我女嫁之不令其憂妻子也

明帝永平四年郭丹為司徒坐事免卒於家後帝回朝會問羣臣郭丹家今何如宗正劉裔對曰昔孫叔敖相

楚馬不秣粟妻不衣帛子孫竟蒙寢丘之封丹出典州
郡入為三公而家無遺產子孫困匱帝乃下南陽訪求
其嗣

鍾離意為僕射以上疏出為魯相後德陽殿成百官大
會帝思意言謂公卿曰鍾離尚書若在此殿不立

章帝建初三年光祿大夫周舉卒朝廷以舉清公亮直
方以為宰相深痛惜之乃詔告光祿勳汝南太守曰昔
在前世求賢如渴封墓式問以光賢哲故公叔見誅翁

歸蒙述所以昭忠厲俗作範後昆故光祿大夫周舉性

侔夷魚

伯夷史
魚也

忠踰隨管

隨食
管仲

前授牧守及還納言出

入京輦有欽哉之績在禁聞有密靜之風予錄乃勲用

登九列方欲式序百物亮協三事不永夙終用乖遠圖

朝廷愍悼良為愴然詩不云乎肇敏戎功用錫爾祉其

令將大夫以下到喪發日復會弔加賜錢十萬以旌委

蛇素絲之節焉

靈帝時楊賜為太尉以寇賊免先是黃巾帥張角等執

左道稱大賢以誑耀百姓天下襁負歸之賜時在司徒
召掾劉陶告曰張角等遭赦不悔而稍益滋蔓今若下
州郡捕討恐更搔擾速成其患且欲切勅刺史二千石
簡別流人各護歸本郡以孤弱其黨然後誅其渠帥可
不勞而定何如陶對曰此孫子所謂不戰而屈人之兵
廟勝之術也賜遂上書言之會去位事留中後帝乃徙
南宮閱錄故事得賜所上張角奏及前侍講注籍乃感
悟下詔封賜臨晉侯邑千五百戶

獻帝時尚書令荀彧卒帝哀惜之祖曰為之廢讌樂

祖日

謂祭祖神之日因為廢樂也共工氏之子曰脩好遠遊祀以為祖神

魏太祖時郭嘉字奉孝為軍祭酒深見委遇會疾篤帝問疾者交錯及薨臨其喪哀甚謂荀攸等曰諸君年皆孤輩惟奉孝最少天下事竟欲以後事屬之而中年夭折命也夫又與荀彧書追傷嘉曰郭奉孝年不滿四十相與周旋十一年險阻艱難皆共罹之又以其通達見世事無所凝滯欲以後事屬之何意卒爾失之悲痛傷

心今表增其子滿千戶然何益亡者追念之感深且奉
孝乃知孤者天下人相知者少又以此痛惜奈何奈何
又與或書曰追惜奉孝不能去心其人見時事事過絕
於人又人多畏病南方有疫嘗言往南方則不生還然
與共論計之當先定此為不但見計之忠厚必欲立功
名推命定事人心乃爾何得使人忘之後太祖征荊州
還於巴丘遇疾疫燒船嘆曰郭奉孝在不使孤至此初
陳羣非嘉不治行檢數廷訴嘉嘉意自若太祖愈益重

之然以羣能持正亦悅焉

傅子曰太祖又云哀哉奉孝痛哉奉孝惜哉奉孝又表於

天子曰臣聞褒忠寵賢未必當身念功繼績思隆後嗣是以楚宗孫叔顯封厥子岑彭既沒爵及支庶故軍祭酒郭嘉忠良淵淑體通性達每有大議發言盈庭執中處理動無遺策自在軍旅十有餘年行同騎乘坐共幄席東禽呂布西取睢固斬袁譚之首平朔土之衆踰越險塞盪定烏丸震威遼東以象表尚雖假天威易為指麾至於臨敵發揚誓命凶逆克殄勲實繇嘉方將表顯短命早終上為朝廷欽惜良臣下自毒恨喪失奇佐宜追增嘉封并前千戶哀亡為存厚往勸來也

王粲字仲宣為侍中從征吳道卒二子為魏諷所引誅後絕太祖時征漢中聞粲子死嘆曰孤若在不使仲宣

無後

荀攸字公達為尚書令從征孫權道薨太祖言則流涕
令曰孤與荀公達周游二十餘年無毫毛可非者真賢
人也

明帝太和中中護軍蔣濟上疏曰宜遵古封禪詔曰間
濟斯言使吾汗出流足事寢歷歲後遂議修之使高堂
隆撰其禮儀帝聞隆沒歎息曰天不欲成吾事高堂生
舍我亡也

晉武帝時太保睢陵公王祥薨時文明皇太后喪始踰月其後詔曰為睢陵公發哀事乃至今雖每為之感歎要未得特叙哀情今便哭之

劉毅為青州大中正卒武帝撫几驚曰失吾名臣不得生作三公即贈儀同三司使者監護喪事

羊祜為征南大將軍都督荊州諸軍事及薨武帝素服哭之甚哀是日大寒帝涕沾鬚鬢皆為冰焉

李喬為司徒薨武帝後思其清節詔曰故司徒李喬太

常彭灌並履忠清儉身沒家無餘積賜齋家錢二百萬
穀千斛灌家半之

惠帝時稽紹為侍中成都王舉兵向京師帝出禦之紹
被害於帝側血濺御服天子深哀惜之及事定左右欲
浣衣帝曰此稽侍中血勿去之

明帝時王廙為荊州刺史及卒明帝與大將軍溫嶠書
曰痛謝鯤未絕於口世將世將廙字復至於此並盛年雋才

不遂其志痛切于心廙明古多通鯤遠有識致其言雖

未足令人改聽然味之不倦近未易有也坐視盡如何
成帝時劉超為右衛將軍為帝所親遇蘓峻之亂超侍
帝石頭峻使任讓將兵入收超及侍中鍾雅帝抱持悲
泣曰還我侍中右衛任讓不奉詔因害之及峻平任讓
與陶侃有舊侃欲持不誅之乃請於帝帝曰讓是殺我
侍中右衛者不可宥繇是遂誅讓及超將改葬帝痛命
之不已詔遣高顯近地葬之使出入得瞻望其墓追贈
衛尉謚曰忠

穆帝時荀羨為兗州刺史鎮下邳以疾篤解職升平二年卒帝聞之歎曰荀令則王敬和相繼凋落股肱腹心將復誰寄乎

後魏太武監國以穆觀為右弼出則統攝朝政入則應對左右事無巨細皆關決焉泰常八年暴疾薨帝親臨其喪悲動左右及即位每與羣臣談宴未嘗不歎息慙慙以為自秦以來佐命勲臣文武兼濟無及之者其見稱如此

于栗磾為鎮南將軍卒栗磾自少治戎迄于白首臨事
善斷所向無前加以謙虛下士刑罰不濫太武甚悼惜
之

屈桓為鎮東大將軍歷官公正帝信任之真君四年墜
馬卒時太武幸陰山恭宗遣使乘傳奏狀太武甚惜之
謂使人曰汝等殺朕良臣何用乘馬遂令步歸贈征西
大將軍

崔浩為司徒浩死後太武北伐時宣城公李桓疾篤傳

者以為卒帝聞而悼之謂左右曰李宣城可惜又曰朕
向失言崔司徒可惜李宣城可哀

孝文時李冲為僕射卒葬於覆舟山後帝車駕自鄴還
雜路經冲墓左右以聞帝時臥疾望墳掩涕久之詔曰
司空文穆公德為時宗勳簡朕心不幸殂逝託墳邱嶺
旋鑿覆舟盼睇塋域悲仁惻舊有慟朕哀可遣太牢之
祭以申吾懷及與留京百官相見皆叙冲亡沒之故言
及流涕

孝明時崔光為車騎大將軍儀同三司薨車駕親臨撫
屍慟哭御輦還宮流涕於路為減常膳言則追傷每至
光坐講讀之處未曾不改容悽悼

孝莊帝時李苗為冠軍將軍討爾朱世隆於河南橋左
右盡死浮於河帝聞苗死哀傷久之曰苗若不死當應
更立奇功

後周太祖時蘓綽為大行臺度支尚書卒於位帝痛惜
之哀動左右及將葬乃詔公卿等曰蘓尚書平生謙退

敦尚儉約吾欲全其素志便恐悠悠之徒有所未達如其厚加贈謚又乖宿昔相知之道進退維谷孤有疑焉尚書令史麻瑤越次而進曰昔晏子齊之賢大夫一狐裘三十年及其死也遣車一乘齊侯不奪其志綽既操履清白謙挹自若愚謂宜從儉約以彰其美太祖稱善及綽歸葬武功唯載以布車太祖與羣公皆步送出同州郭門外太祖親於車後酌酒而言曰尚書平生為事妻子兄弟不知者吾皆知之惟爾知吾心吾知爾意方

欲其定天下不幸遂捨我去奈何因舉聲慟哭不覺失
卮於手至葬日又遣使祭以太牢太祖自為其文

劉亮為車騎大將軍東州刺史卒喪還京師太祖親臨
之泣而謂人曰股肱喪矣腹心何寄

隋文帝時劉行本為太子左庶子太子虛心敬憚未幾
卒官帝甚傷惜之及太子廢帝曰嗟乎若使劉行本在

男不及此

又裴政為太子左庶子多所規正見稱純終
出為襄州總管卒官及太子廢高祖追憶之

日向遣裴政劉行本在
共輔弼之應不令至此

王韶字子相為晉王并州行臺右僕射秦王俊為并州
總管仍為長史歲餘馳驛入京勞敝而卒時年六十八
高祖甚傷惜之謂秦王使者曰語爾王我前令子相緩
來如何乃遣馳驛殺我子相豈不繇汝耶言甚悽愴使
有司為之立宅曰往者何用宅為但以表我深心耳又
曰子相受我委寄十有餘年終始不易寵章未極舍我
而死乎發言流涕因命取子相封事數十紙傳示羣臣
帝曰其直言規正裨益甚多吾每披尋未嘗釋手

元巖為蜀王秀益州總管長史王性好奢侈憚巖為人每循法度巖卒之後王漸致非法寮佐無敢諫正者及秀得罪帝曰元巖若在吾兒豈有是乎

柳裴開皇初為曹州刺史高祖思裴定策功欲加榮秩將徵之顧問朝臣曰曹州刺史何當入朝或對曰即今冬也帝乃止裴尋卒高祖傷惜者久之

煬帝時長孫晟為右驍衛將軍卒帝深悼惜之賜贈甚厚後突厥圍雁門帝歎曰向使長孫晟在不令匈奴至

此

元壽為右光祿大夫大業七年兼左翊衛將軍從征遼東行至涿郡遇疾卒時年六十三帝悼惜焉哭之甚慟贈尚書右僕射光祿大夫後帝追思之擢子敏為守內史舍人

唐高祖武德中許紹為陝州刺史行軍總管趙郡王孝恭之擊蕭銑也復令紹督兵以圍荊州會紹卒帝聞而傷惜為之流涕

太宗貞觀四年尚書右僕射杜如晦薨帝手詔著作郎
虞世南曰朕與如晦君臣義重不幸奄從物化追念勲
舊痛惜于懷卿體吾此意為製碑文也後因食瓜而美
愴然悼之遂輟食之半遣使置之靈座焉後賜房玄齡
黃銀帶因謂玄齡曰如晦與公同輔朕今日所賜唯獨
見公因泣然下泣以黃銀辟惡恐為鬼神所畏令取金
帶遣玄齡親送于靈所其後帝夢見如晦若平生及旦
以告玄齡言畢欵欵侍衛莫不掩涕因遣送御食以祭

馬明年如晦忌日帝復遣尚書官至第慰問妻子其國
官府佐皆不之罷終始思遇未之有焉

六年襄州都督張公謹卒太宗聞而嗟悼出次發哀有
司奏言陰陽書曰子在辰不可哭泣又為流俗所忌帝
曰君臣之義同於父子情發于中安避辰日遂哭之

十二年弘文館學士虞世南卒帝手勅魏王泰曰虞世
南於我猶一體也拾遺補闕無日暫忘寔當代名臣人
倫準的吾有小失必犯顏而諫之今其云亡石渠東觀

之中無復人矣痛惜豈可言也未幾作詩一篇追思往古興亡之道既而嘆曰鍾子期死伯牙破琴朕之此篇將何所視因令起居郎褚遂良詣其靈帳讀而焚之莫世南神識感悟

十六年太子太師魏徵薨帝追思不已謂侍臣曰夫以銅為鏡可以正衣冠以古為鏡可以知興替以人為鏡可以明得失朕嘗保此三鏡以防已過今魏徵殂逝遂亡一鏡矣

十八年宴司徒長孫無忌以下十餘人於丹霄殿各賜以獬皮右衛大將軍薛萬徹豫焉帝意在賜萬徹而誤呼其兄萬均愴然不樂曰萬均朕之兄舊不幸早亡朕不覺呼名豈其魂靈欲朕之賜也因令取皮呼萬均以同賜而焚之於前侍坐者無不感嘆是歲右衛大將軍工部尚書李大亮卒帝素服哭於雒陽苑甚慟

十九年車駕征遼中書令岑文本卒帝親臨視撫之流涕其夕帝聞巖鼓之聲曰文本殞述情深惻但今宵夜

警所不忍聞遂命停之

溫彥博為中書令薨太宗謂侍臣曰彥博以憂國之故
勞精竭神我見其不逮已二年矣恨不縱其閒逸致天
性靈

姜確為左屯衛將軍遼東之役以行軍總管督兵攻蓋
牟城中流矢而卒時年五十一太宗甚哀悼之為五言
詩曰鑿門初奉衛仗節始臨戎振鱗方躍浪騁翼正凌
風未展六騎術先虧一簣功防身不足智狗命有餘忠

悲駭嘶向路哀笳咽遠空悽涼大樹下流悼滿深衷時
人榮之子疎嗣以確死王事拜朝散大夫

高宗總章二年司空英國公李勣薨帝謂左相姜恪等
曰貞觀之初勣已經事朕荏苒之間四十餘載歲月既
久情素可知此人奉上忠貞事親孝謹執心平直終始
不渝歷事三朝未嘗有過自古賢臣罕有其比忽此殂
逝痛惜良深此公為性廉慎不營產業今既亡沒當無
餘財所有賙賻務令優厚因泣下久之

開耀元年十二月太子少保郝處俊卒贈開府儀同三司荊州大都督帝甚傷悼之顧謂侍臣曰處俊志存忠正兼有學識至於雕飾服翫雖極知無益然常人不能抑情棄捨皆好尚奢侈處俊常保其質素終始不渝雖非元勳佐命固亦多時驅使又見遺表憂國忘家今既云亡深可傷惜即於光順門舉哀一日不視事祭以少牢

玄宗開元八年右散騎常侍褚元量卒帝震悼久之謂

宰相宋璟蘓頲等曰元量碩儒且有德業朕蚤所師習
每用尊崇三史九經前言往行有可以裨益時政規正
朕躬未嘗不瞭瞭切論昨聞其屬續之時唯以修書為
意永念其逝實軫于懷庶事宜皆優厚

十五年蘓頲卒其葬日帝遊咸宜宮將出獵聞頲喪出
愴然曰蘓頲今日葬吾寧忍娛遊遂中路還宮

二十二年八月追贈故大理卿袁仁敬為越州刺史仁
敬修身簡儉為政以清介稱帝思其為人乃詔褒贈

肅宗時辛雲京太原節度回紇畏之數年無烽警之虞卒肅宗為之流涕後宰臣子儀元載等見帝言及雲京泣然久之

代宗大歷中宰相楊綰薨帝驚悼久之詔贈司空仍宣旨謂百官曰天不使朕致太平奪我楊綰之速也甫及大殮與卿等悲悼同懷宰輔賻贈恩遇哀榮之盛近來未有其比

德宗興元元年二月在奉天贈故永平軍節度行營兵

馬使右散騎常侍兼御史大夫武威郡王賈隱林左僕射賜實封三百戶隱林累有殊功性頗朴直初奉天圍解百寮稱賀隱林抃舞因質言曰朱泚奔遁臣下大慶此皆宗社無疆之休然陛下性靈太急不能容忍若舊性不改雖朱泚敗亡臣亦恐憂未艾也帝虛懷納之及是思其讜言功效故褒贈有加焉仍贈絹百疋米百石喪官給

貞元元年八月西平王李晟既卒時初城鹽州復鹽池

帝賜宰相新鹽惻然思之命致鹽於靈座又特遣中使至晟第存撫諸子教戒備至聞愿等有一善帝喜見於色九月以贈太師李晟薨日近罷九日宴會十一年十一月辛亥以前太子賓客李愿為左領軍大將軍李憑為右威衛大將軍依前兼中丞皆太尉晟之子以免喪故晟諸子同日授官者凡九人景辰李愿及諸弟等九人召見於延英帝見愿等憫然久之曰朕雖在此常念卿等追懷勲舊何日忘之卿等咸善居喪或出於等倫

朕甚嘉之各賜衣一襲帛三十疋

張宏靖為監察御史時德陽公主下嫁治地將侵宏靖

家廟宏靖拜章陳情具述祖考之德

宏靖祖嘉貞相立宗父延賞相德宗

德宗慰撫之不令毀廟

憲宗元和四年覽貞觀故事見侍中魏徵諫諍匪躬詔
令京兆尹訪其子孫及故居其居在永興坊已質賣更
無魏姓折為九家矣帝愍之出內庫錢二百萬購之以
賜其孫稠及善仍禁其質賣

文宗開成四年司徒中書令裴度以疾歸第帝思其勲
舊勞問賜與中使旁午仍形於詠言御札及聞度已薨
歿帝震悼久之重令繕寫置於靈座

周太祖時翟光鄴權知京兆尹光鄴卒帝初聞訃至恻
然驚嘆曰天不助余為治賢良之臣遽此奄忽非獨予
之不幸亦民之不幸也傷哉

世宗顯德六年三月樞密使王朴暴卒帝聞之駭愕即
時幸其第及柩前以所執玉鉞卓地而慟者數四

抑外戚

王者膺天祿之重履至尊之勢非獨內德茂也盖有外戚之助焉其所繇來尚矣然而地居貴寵家承豐富驕侈不期而自至禮度因縱而致敗自非見之於未朕防之於將然曷以免夫禍機而綏乎吉祿者矣故有挺英果之斷躬哲惠之美志絕乎私愛慮極乎幾深避閭閻之嫌思名器之重察其才智鑒乎古昔但加體貌之禮莫忝帷幄之議至有為惡自敗寘之於典刑檢身無狀

申之以教督抑損斯在懲艾兼至用能恢至公之道符
大中之訓垂之嘉話為方來之軌範焉

漢文帝以皇后弟竇廣國賢有行欲相之曰恐天下以

吾私廣國久念不可而高祖時大臣餘見無可者

見謂
見在

人乃以御史大夫嘉為丞相

宣帝后霍光女也宣帝自在民間聞知霍氏尊盛日久
內不能善光薨帝始躬親朝政御史大夫魏相給事中
光妻顯謂其子禹雲山曰汝曹不務奉大將軍餘業

曹
輩

也今夫給事中他人一間汝能復自救耶會魏大夫為

丞相數宴見言事平恩侯與侍中金安上等徑入出省

中時霍山自若領尚書

自若猶言如故也

帝令吏民得奏封事

不闕尚書羣臣進見獨來往

謂各各得盡言于上也

於是霍氏甚

惡之

元帝時馮野王為大鴻臚數年御史大夫李延壽病卒在

位多舉野王帝使尚書選第中二千石

定其高下之差也

而野

王行能第一帝曰吾用野王為三公後世必謂我私後

官親屬以野王為比

比例比音必媚之

乃下詔曰剛強堅固確

然亡欲大鴻臚野王是也心辨善辭可使四方少府五

鹿充宗是也廉潔節儉太子少傅張譚是也其以少府

為御史大夫上繇下第而用譚越次避嫌不用野王以

昭儀兄故也野王乃歎曰人皆以女寵貴我兄弟獨賤

野王雖不為三公甚見器重有名當世成帝立有司奏

野王王舅不宜備九卿以秩出為上郡太守哀帝少在

國見成帝委政外家王氏僭盛常內悒悒即帝位多欲

有所規正封拜丁傳奪王氏權

後漢光武時馮衍與外戚陰興陰就交結帝懲西京外戚賓客故皆以法繩之大者抵死徙其餘至貶黜

明帝永平中馬援女立為皇后帝圖畫建武中名臣列將于雲臺以椒房故獨不及援東平王蒼觀圖言於帝曰何故不畫伏波將軍像帝笑而不言馬防以特進就第多牧馬畜賦斂羗胡帝不善之數加譴勅所以禁遏甚備繇是權勢稍損賓客亦衰

館陶公主為子求郎明帝不許而賜錢千萬謂曰郎官上應列宿出宰百里有非其人則民受其殃是以難之閻章永平中為尚書以二妹為貴人章精力曉舊典久次當遷以重職帝以後宮親屬竟不用出為步兵校尉魏太祖初卞后弟秉當建安時得為別步司馬后嘗對太祖怨言太祖答言但得與我作婦弟不為多邪后又欲太祖給其錢帛太祖又曰但汝盜與不為足邪故訖太祖世秉官不移財亦不益又詔曰后族之家不得當

輔政之任又不得橫受茅土之爵以此詔傳後世若有違背天下共誅之

文帝黃初中欲封太后父母尚書陳羣奏曰陛下以聖德應運受命創業草制當永為後式按典籍之文無婦人分土命爵之制在禮典婦因夫爵秦違古法漢氏因之非先王之令典也帝曰此議是也其勿施行以作著詔下藏之臺閣永為後式

後魏孝文時李比思皇后從父鳳之子也爵栢人侯弟

安祖浮陽侯典祖安喜侯道念真定侯昆弟四人以外
戚蒙見詔謂曰卿之先世內外有犯得罪於時然官必
用才以親非興邦之選外氏之寵超於末葉從今已後
自非奇才不得復外戚謬班抽舉既無殊能今且可還
後列降爵安祖等改侯為伯並去軍號

唐德宗貞元六年閏四月詔原富平令侯遵罪傳其官
初遵縣人李載配納元陵園糞兩車愆期或譖毀載於
遵者因寄怒以痛絕之載所負之直不過數千而罰之

三百貫又枷禁拽辱馬載妹壻昭德皇后弟王果奏
言帝命御史臺鞠之具款伏宰臣董晉竇叅進曰李載
不納差科未為巨蠹侯遵峻其懲罰頗越常倫况是國
親去就有禮毀損過甚理當罪責望貶澧州司戶叅軍
帝不欲以戚屬之故而貶吏故有是命

憲宗元和元年九月戊戌詔曰公主郡主駙馬等所養
鷹鷄按放但於城南不得輒越諸界其故違者府縣切
加簡察錄名聞奏

十二年十二月以駙馬都尉張克禮鄭何劉士溼等並
停止官慮以戚屬不脩官業故也

文宗開成四年正月丁卯夜於咸泰殿觀燈延安公主
衣裙寬大即時遣歸駙馬都尉竇澣待罪勅曰公主入
叅衣服踰制從夫之義過有所歸竇澣宜奪兩月賜錢
宣宗大中五年八月庚子勅曰應公主家有庄宅邸店
宜依百姓例差役徵科如邑司擅行文牒隱庇兼蔽匿
要人便委諸軍諸使及府縣當時捕捉收禁聞奏其邑

司官吏及印本緣徵封須行文牒今即便因他事攬擾
府縣自今以後除徵封外如緣公事並令邑司申宗正
寺寺司與酌量公事行牒其邑司並不得擅行文牒

尊外戚

春秋褒紀侯之義大雅詠申伯之思蓋外戚之尊其所
由來者尚矣肇自周室降及漢家厥政彌文其制增重
崇母后之族貴皇嬪之親慶延祖考寵被存沒或追崇
名謚建置寢園或茂錫珪璋大啓土宇畫飾終之禮以

責於泉扃極加等之榮以光其門闕蓋王者展因親之
孝重齊體之道焉然能抑河潤之勢監肺腑之私時中
而行蓋可宗也

周桓王將納后於紀紀本子爵故先褒為侯一云天子
將娶于紀與之奉宗廟傳之無窮故封之百里蓋以為
天子得娶庶人女以其得專封也

漢高祖為漢王元年封呂后父呂公為臨泗侯

文帝即位薄太后母前死葬櫟陽北帝乃追封太后父

為靈文侯會稽郡置園邑三百家長丞以下使奉守寢

廟上食祠如法櫟陽亦置靈文夫人園令如靈文侯園

儀

又景實皇后景帝母也親早卒葬觀津薄太后詔有司追封實后父為安成侯母曰安成夫人令濟河置

園邑二百家長丞

守比靈文園法

武帝即位尊皇太后

帝母景帝王后母也

母臧兒為平原君追尊

皇太后父仲為共侯仲槐里人也槐里起園邑二百家

長丞奉守及平原君薨葬長陵亦置園邑如共侯法

昭帝即位追尊皇太后

帝母武帝趙婕妤也

外祖趙父為順成侯

詔右扶風置園邑二百家長丞奉守如法

上官安上官皇后父祖將軍桀子也初安女入為昭帝
媿仔安為騎都尉月餘立為皇后安以后父封桑樂侯
遷車騎將軍后母前死葬茂陵郭東追尊曰敬夫人置
園邑二百家長丞奉守如法

宣帝地節三年求得悼后

帝母史皇孫
王夫人也

母王媿制詔御

史賜外祖母號為博平君以博平蠡吾兩縣戶萬一千
為湯沐邑追賜外祖王廼始謚曰思成侯詔涿郡治冢

室置園邑四百家長丞奉守如法歲餘博平君薨謚曰

思成夫人詔徙思成侯合葬奉明顧成廟南置園邑長

丞

本號廣明故戾太子傳云皇孫及王夫人皆葬廣明其後以置園邑奉守改曰奉明

罷涿郡思

成園

許廣漢宣帝許后王父也帝即位歲餘封為昌成君後

封為平恩侯位特進廣漢薨謚曰戴侯葬南園旁置邑

三百家長丞奉守如法

王奉光宣帝皇后父也后立帝封奉光為邛城侯元帝

即位二年奉光薨謚曰共侯葬長門南園邑二百家長
丞奉守如法

元帝即位以太子母王妃為婕妤封其父楚為平陽侯
後三日婕妤立為皇后楚位特進永光二年薨謚曰頃
侯

成帝許皇后父平恩侯嘉元帝舅也嘉自元帝時為大
司馬車騎將軍輔政八九年矣及成帝立久之以特進
侯就朝位後歲餘薨謚曰恭侯

趙臨成帝趙后父也后初入宮為媼孖帝封臨為成陽侯

哀帝傅皇后定陶傅太后從弟子也哀帝即位傅太后封傅妃父晏為孤鄉侯傅氏既盛安寂尊重

後漢光武郭皇后父昌真定人仕郡功曹娶真定恭王

女號主

恭王名普景
帝七代孫

建武二十六年后母號主薨帝親

臨送葬百官大會遣使者迎昌喪柩與主合葬追贈昌陽安侯印綬謚曰思侯

陰隆光烈陰皇后父也南陽人建武九年追爵謚隆為
宣哀侯

樊重光武外祖也建武十八年帝南祠章陵過湖陽祀
重墓追爵謚為壽張敬侯立廟於湖陽

章帝竇皇后父勲大司徒融孫也建初七年追爵謚勲
安成思侯

和帝永元九年追尊貴人

帝母章帝梁貴人也

為恭懷皇后制詔

三公大鴻臚曰夫孝莫大於尊尊親親其義一也詩云

父兮生我母兮鞠我撫我畜我長我育我顧我復我出

入腹我欲報之德昊天罔極朕不敢興事覽於前世太

宗中宗是有舊典

太宗文帝
中宗宣帝

追命外祖以篤親親其追

封謚皇太后父竦為褒親愍侯比靈文順成侯魂而有

靈嘉斯寵榮好爵顯服以慰母心遣中謁者與嫗及扈

備禮西迎竦喪

竦死漢陽獄
故西迎也

詣京師改殯賜東園畫棺

玉匣衣衾建塋於恭懷皇后陵旁帝親臨送喪百官畢

會

鄧訓鄧皇后父也為護羌校尉永元二年卒官十四年
后立元興元年和帝以訓皇后之父使謁者持節至訓
墓賜策追封謚曰平壽敬侯中宮自臨百官大會

安帝永初元年爵號太夫人為新野君萬戶供湯沐邑
安帝元初二年立閭貴人為皇后二年以後父侍中暢
為長水校尉封北宜春侯食邑五千戶四年卒謚曰文
侯延光元年追尊后母宗為熒陽侯

宋楊女為章帝貴人安帝之祖母也安帝即位追封謚

楊為當陽穆侯

順帝梁皇后父商恭懷皇后弟葉氏侯雍子也為黃門
侍郎永建元年襲父封三年選商女及妹入掖庭遷侍
中屯校尉陽嘉元年女為皇后妹為貴人加商位特進
更增國土賜安車駟馬其歲拜執金吾三年以商為大
將軍固稱疾不起四年使太常桓焉奉策就第即拜商
乃詣闕受命明年夫人陰氏薨追號開封君贈印綬
桓帝鄧皇后父香和熹皇后從兄子也后立帝追贈香

車騎將軍安陽侯印綬封后母宣為昆陽君宣卒贈葬禮皆依后母舊儀

竇武扶風平陵人桓思皇后父也延熹八年后初入掖庭為貴人帝拜武郎中其冬立為皇后武遷越騎校尉封槐里侯五千戶明年冬拜城門校尉靈帝立拜武為大將軍更封武為聞喜侯

靈帝建寧四年宋皇后立帝拜后父酆執金吾封不其鄉侯

何真南陽宛人靈思皇后父也后以選入掖庭光和三年立為皇后明年追號真為車騎將軍舞陽宣德侯因封后母興為舞陽君

獻帝伏皇后父完為侍中興平二年后立完遷執金吾建安元年拜完輔國將軍儀同三司

魏明帝太和元年三月以中山魏昌之安城鄉戶千追封帝母文昭甄皇后父上蔡令追謚曰敬侯

毛嘉河內人明悼毛皇后父也太和元年后立明帝拜

嘉騎都尉進為奉車都尉又封博平鄉侯遷光祿大夫
下廣文帝母武宣皇后祖父明帝太和四年追謚廣曰
開陽君侯后父遠曰敬侯祖母周封陽都君為恭侯夫
人皆賜印綬

郭永安平廣宗人文德皇后父也明帝太和四年追謚
永為安陽鄉敬侯母董為都鄉君青龍三年又追改封
永為觀津敬侯世婦董為堂陽君使使者奉策祠以太
牢

齊王甄后文昭皇后兄儼孫女也后立父已沒帝封后
母三人樂鄉君

郭滿西平人明元皇后父也齊王即位追封謚滿為西
都定侯太后母杜為郟陽君

高貴鄉公卞后父隆武宣皇后弟秉孫也以后父為光
祿大夫位特進封睢陽侯妻王為睢陽鄉君追封隆前
妻留為順陽鄉君后親母故也

陳留王卞后父琳秉弟蘭子也后立時小已歿封大妻

留曰上陽鄉君

晉武帝泰始九年追贈景獻羊皇后母漢左中郎將蔡邕女陳留蔡氏為之陽縣君謚曰穆

王肅妻羊氏武帝母文明王皇后母也未崇謚號泰始三年下詔曰昔漢文追崇靈文之號武宣有平原博平之封咸所以奉尊尊之敬廣親親之恩也故衛將軍蘭陵景侯王肅夫人羊氏含章體順仁德醇備內承世胄出嬪大國三從之行率禮無違仍遭不造頻喪統嗣撫

育衆裔克成家道母儀之教光于邦族誕啓聖明祚流
萬國而早世殂殞不遇休寵皇太后孝思烝烝永慕因
極朕感存遺訓追遠傷懷其封夫人為縣君依德紀謚
主者詳如舊典於是使使持節謁者何融追謚為平陽
靖君其後帝追慕不已復下詔曰外曾祖母故司徒王
朗夫人楊氏舅氏尊屬鄭劉二從母先后至愛每惟聖
善敦睦遺言渭陽之感永懷靡及其封楊夫人及從母
為鄉君邑各五百戶太康七年追贈后祖母夏侯氏為

滎陽鄉君

楊文宗武元皇后父也初事魏為通事郎早卒武帝以
后父追贈車騎將軍謚曰穆皇后終於明光殿詔曰皇
后逮事先后常冀能終始永奉宗廟一旦殞殂痛惜傷
懷每自以夙喪二親於家門之情特隆入有心欲改葬
父祖以頃者務崇儉約初未有言近垂困說此意情益
愍之其使領前軍將軍駿等自克改葬之宜至時主者
供給葬事賜謚母趙氏為縣君以繼母段氏為鄉君傳

不云乎慎終追遠民德歸厚且使亡者有知尚式嘉之
楊駿武悼皇后父也為鎮軍府司馬武帝以后父超居
重位自鎮軍將軍遷車騎將軍封臨晉侯惠帝即位進
駿為太傅大都督假黃鉞錄朝政

惠帝賈皇后父充為太宰魯公薨帝即位充廟備六佾
之樂母郭氏為宜城君及郭氏亡謚曰宣特加殊禮

羊玄之惠帝羊皇后父也初為尚書郎帝以后父拜光
祿大夫特進散騎常侍更封興晉侯遷尚書右僕射加

侍中進爵為公成都王頴之攻長沙王乂也以討立之
為名遂憂懼而卒追贈車騎將軍開府儀同三司

明帝即位追贈元敬虞皇后父故南陽王文學豫為散
騎常侍驃騎大將軍開府儀同三司平山縣侯又追懷
母養之恩贈豫妻王氏為邙陽縣君

庾琛明穆皇后父也為丞相軍諮祭酒卒官明帝以后
父追贈左將軍妻母丘氏追封鄉君子亮陳先志不受
咸和中成帝又下詔追贈琛驃騎將軍儀同三司亮又

辭焉

成帝恭杜皇后父又鎮南將軍預孫襲封當陽侯為丹陽丞卒咸康初追贈金紫光祿大夫謚曰穆后母裴氏封高安鄉君至孝武帝崇進為廣德縣君裴氏壽考號曰杜姥

康帝即位徵拜褚皇后父豫章太守哀為侍中遷尚書封后母謝氏為尋陽鄉君穆帝即位尊后曰皇太后帝幼冲未親國政太后臨朝有司以哀皇太后父議加不

臣之禮拜侍中衛軍錄尚書事永和五年卒贈侍中太傅謚曰元穆六年正月帝臨朝以哀喪故懸而不樂十二年正月帝臨朝又以哀妻皇太后母喪懸而不樂

穆帝即位徵拜何皇后父準散騎侍郎不起卒升平元年追贈金紫光祿大夫封晉興縣侯子愔以父素行高潔表讓不受

哀帝即位贈王皇后母爰氏為國安鄉君

孝武寧康初追贈簡順王皇后父故光祿勳遐為光祿

大夫加散騎常侍

王蘊孝武定王皇后父也為吳興太守定后立蘊以后
父遷光祿大夫領五兵尚書封建昌縣侯蘊不肯拜乃
授都督京口諸軍事左將軍徐州刺史假節鎮于京口
徵拜左僕射遷丹陽尹復為都督浙江東五郡鎮軍將
軍會稽內史太元九年卒贈左光祿大夫開府儀同三
司

安帝即位追贈王皇后父故中書令獻之侍中特進光

祿大夫

恭帝褚皇后父爽為義興太守早卒帝以后父追贈金紫光祿大夫

後魏道武慕容皇后立母孟為深陽君

文成和平二年追贈母間后祖父延襄康公成定襄懿王

馮熙文成馮皇后父為太師內都太官文成母詔熙上書不臣入朝不拜孝文太和十九年薨于代將葬贈假

黃鉞侍中都督十州諸軍事大司馬太尉冀州刺史加
黃屋左纛備九錫前後羽葆鼓吹皆依晉太宰安平王
故事

宣武立高貴嬪為皇后入座奏封后母王氏為武邑郡
君

高颺宣武母文昭皇后父也景明中贈颺左光祿大夫
賜爵渤海公母蓋氏追封清河郡君

于勁宣武于皇后父也初為征虜將軍宣武納其女為

后封太原郡公妻劉氏為章武郡君勁卒贈司空

孝明踐祚以宣武胡后

帝母也

父河州刺史國珍為光祿

大夫後妻梁為趙平君

唐高宗王皇后父仁祐為羅山令高宗為皇太子以仁祐為陳州刺史永徽初以仁祐為特進魏國公母柳氏為魏國夫人仁祐尋卒贈司空

中宗和思趙皇后父瓌為壽州刺史坐越王真連謀被誅神龍元年贈左衛大將軍

韋玄貞中宗韋庶人父也為晉州叅軍庶人初納為太子妃以玄貞為豫州刺史神龍元年中宗即位追贈玄貞為上洛郡王

睿宗肅明劉皇后父延景陝州刺史景雲元年追贈尚書右僕射沛國公

竇孝謨睿宗昭成竇皇后父也為潤州刺史景雲元年追贈太尉邠國公

玄宗王皇后父仁皎下邳人先天元年以仁皎為太僕

卿累加開府儀同三司祁國公

肅宗張皇后父去逸為太僕卿肅宗即位贈左僕射母
竇氏封義帝縣主

代宗竇應二年追贈肅宗章敬吳皇后

代宗母也

祖神泉司

徒贈后父令珪太尉贈后母李氏秦國夫人

德宗建中元年贈代宗睿真沈皇后

德宗母也

父故秘書監

易直太師貞元七年詔贈外祖隨令沈琳贈司徒追封
徐國公與外祖易直等立五廟以琳為始祖緣祠廟所

須官給

王遇德宗昭德王皇后

順宗母也

父也官至秘書監貞元中

贈揚州大都督

順宗莊憲王皇后憲宗母也曾祖思敬試太子賓客祖
難得英武軍使贈潞州都督父子顏衛尉卿順宗內禪
贈思敬司徒難得太傅子顏太師

穆宗即位詔皇太后

憲宗懿安郭皇后穆宗母也

曾祖贈太保追封

岐國公敬之贈太傅太后父駙馬都騎太尉母號國

大長公主贈齊國大長公主

敬宗即位崇重母族贈穆宗恭僖王皇后

敬宗母也

父故嫠

州金華令韶卿司空母張氏贈趙國夫人

文宗即位贈穆宗貞獻蕭皇后

文宗母也

曾祖倭為太保祖

聰為太傅父俊為太師

冊府元龜卷一百四十一

欽定四庫全書

子部

冊府元龜卷一百四十二至
五

詳校官中書臣涂日煥

員外郎臣牛稔文覆勘

總校官庶吉士臣何思鈞

校對官中書臣宋枋遠

謄錄監生臣王 焜

欽定四庫全書

冊府元龜卷一百四十二 宋 王欽若等 撰

帝王部

弭兵 和好

弭兵

夫王者之兵本於禁暴聖人之武先乎不殺用以拯溺
豈云耀威其出征也慰時雨之望其成功也思燎原之
戒雖有忘戰必危之論亦著佳兵不祥之說歷觀中古

以迄後世或因疆理之甫定乘寇之方息以殘民蠹財而為念將戢戈橐弓之是圖繇是濬發明詔深惟遠馭示不復用以愛養於羣生悉罷以歸俾轉緣於農作以至厭於遠略疲於出師謹守備以息攻戰節經費而完物力使夫金草罔試而方夏以寧養老長幼不失其所斯之謂至德矣

周武王既克商乃偃武脩文

倒載干戈包以虎皮示不用行禮射設庠序修文教

歸馬於華山之陽放牛於桃林之野示天下弗服

山南曰陽

桃林在華山東皆非長養牛馬之地欲使自生自死示天下不服乘禮記曰武王克商濟河而西車甲衅而藏之府庫而弗復用倒載干戈包之以虎皮將帥之士使為諸侯名之曰建橐然後天下知武王不復用兵也史記云武王滅紂縱馬于華山之陽放牛於桃林之虛音墟偃干戈振兵釋旅示天下不復用也

漢高祖五年十二月既平項羽五月兵皆罷歸家帝下

令曰兵不得休八年萬民與苦甚前或相聚保山澤不

書名數保守也安也守而安之以避難也名數謂戶籍也今天下已定令各歸

其縣復故爵田宅復還也使之以法教訓辨告勿笞辱辨告

者分別義理以曉諭之

武帝征和四年封丞相田千秋為富民侯以明休息思
富養民也初帝通西域置校尉屯田渠犂是時軍旅連
出師行三十二年海內虛耗貳師將軍李廣利以軍降
匈奴帝既悔遠征伐而搜粟都尉桑弘羊與丞相刺史
奏言故輪臺東捷枝渠犂皆故國地廣饒水草有溉田
五千頃以上處溫和田美可益通溝渠種五穀與中國
同時熟其旁國少錐刀貴黃金綵繒可以易穀食宜給
足不可乏

言以錐刀及黃金綵繒與此旁國
易穀食可以給田卒不憂乏糧

臣愚以為

可遣屯田卒詣故輪臺以東置校尉三人分護各舉圖

地形通利溝渠務使以時益種五穀張掖酒泉

益多也

遣

騎假司馬為斥堠屬校尉事有便宜因騎置以聞

騎置即今

之驛馬也田一歲有積穀募民壯健有累重敢徙者詣田所

累重謂妻子家屬也就畜積為本業益墾溉田稍築列亭連城而

西以威西國輔烏孫為便臣謹遣徵事臣昌分部行邊

嚴敕太守都尉明烽火選士馬謹斥堠蓄芟草願陛下

遣使使西國以安其意臣昧死請帝廼下詔深陳既往

之悔曰前有司奏欲益民賦二十助邊用

二十者每口轉增二十錢

也是重困老弱孤獨也而今又請遣卒田輪臺西於車

師千餘里前開陵侯擊車師時

開陵侯匈奴界和王來降者

危須尉

犁樓蘭六國子弟在京師者皆先歸發畜食迎漢軍

謂畜

馬牛羊等也

又自發兵凡數萬人王各自將兵圍車師降其

王諸國兵便罷力不能復至道上食漢軍

食讀曰餘

漢軍破

城食至多然士自載不足以竟師

士雖各自載量而在道已盡至於歸塗尚

苦乏食不足不能終師旅之事也

彊者食盡畜產羸者道死數千人朕

發酒泉驢橐駝負食出玉門迎軍吏卒起張掖不甚遠

然尚厮留甚衆

厮留言其前後雖厮不相連及也厮音斯

曩者朕之不明以

軍侯弘上書言匈奴縛馬前後足置城下馳言秦人我

句若馬

謂中國人為秦人習故言也句乞與也若汝也乞音愾

又漢使者久留不

還故興師遣貳師將軍

興事而遣之

欲以為使者威重也古

者卿大夫與謀

與讀曰豫

參以著龜不吉不行

謂公卿大夫謀事尚不專

決猶親問著龜

迺者以駙馬書徧視丞相刺史二千石諸大夫

郎為文學者

視讀曰示為文學謂經書之人

迺西郡屬國都尉成忠趙

破奴等皆以虜自縛其馬不祥甚哉或以為欲以見疆

見顯

夫不足者視人有餘

言其誇張也視亦讀曰示

易之卦得大過

爻在九五

其繇曰枯楊生華象曰枯楊生華何可久也謂匈奴破不久也

匈奴困敗公

車方士太史治星望氣及太卜龜著皆以為吉匈奴必

破時不可再得也

今便利之時後不可再得

又曰北伐行將於駙山

必克卦諸將貳師最吉

上遣諸將而於卦中貳師最吉也

故朕親發貳

師下駙山詔之必毋深入今計謀卦兆皆反繆

言不效也繆妄

也重合侯得虜侯者言聞漢軍當來匈奴使巫埋羊牛

所出諸道及水上以詛軍

於軍所行之道及水上埋牛羊

單于遺天子

馬裘常使巫祝之縛馬者詛軍事也又卜漢軍一將不

吉匈奴常言漢極大然不能饑渴

能音耐

失一狼走千羊

廼者貳師敗軍士死略離散

言死及被虜略并自離散也

悲痛常在

朕心今請遠田輪臺欲起亭隧

隊者依深險之處開行道也

是擾勞

天下非所以優民也今朕不忍聞大鴻臚等又議欲募

囚徒送匈奴使者明封侯之賞以報忿五霸所弗能為

也

五霸尚恥不為况今大漢也

且匈奴得漢降者常提掖搜索問以

所聞

搜索者恐其或私齋文書也

今邊塞未正闌出不禁障候長吏

使卒獵獸以皮肉為利辛苦而烽火之失亦上集不得

言邊塞有闌出逃亡之人而主者不禁又長吏於皮肉多使障候之卒獵獸故令烽火有乏又其人勞苦因致

奔亡凡有此故令失皆不集於所上文書後降者來若捕生口虜乃知之既不

上書所以當時不知至有降者來及捕生口或虜得匈奴人言知乃知此事當今務在禁苛

暴止擅賦力本農修馬復令馬復因養以免徭以補缺母乏武

備而已郡國二千石各上進畜馬方略補邊狀與計對

與上計者同來赴對也繇是不復出軍

宣帝地節三年十月詔曰朕既不德不能附遠是以邊境屯戍未息今復飭兵重屯久勞百姓非所以綏天下也其罷車騎將軍右將軍屯兵

後漢光武建武六年關東悉平帝積苦兵間以隗囂遣子內侍公孫述遠據邊陲乃謂諸將曰且當置此兩子於度外耳因數騰書隴蜀告示禍福

十二年既平隴蜀帝在兵間久厭武事且知天下疲耗思樂息肩自隴蜀平後非警急未嘗復言軍旅皇太子

嘗問攻戰之事帝曰昔衛靈公問陳孔子不對此非爾所及

二十七年減官乃與楊虛侯馬武上書曰匈奴貪利無有禮信窮則稽首安則侵盜緣邊被其毒痛中國憂其抵突敵今人畜疫死旱蝗赤地役困乏力不當中國一郡萬里死命懸在陛下福不再來時或易失豈宜固守文德而墮武事乎今命將臨塞厚縣購賞喻告高句驪烏桓鮮卑攻其左發河西四郡天水隴西羌胡擊其右

如此契丹之滅不過數年臣恐陛下仁恩不忍謀臣狐
疑令萬世刻石之功不立于聖世詔報曰黃石公記曰
柔能勝剛弱能勝強柔者德也剛者賊也弱者仁之助
也强者怨之歸也故曰有德之君以所樂樂人無德之
君以所樂樂身樂人者其樂長樂身者不久而亡舍近
謀遠者勞而無功舍遠謀近者逸而有終逸政多忠臣
勞政多亂人故曰務廣地者荒務廣德者強有其有者
安貪人有者殘殘滅之政雖成必敗今國無善政災變

不息百姓驚惶人不自保而復欲遠事邊外乎孔子曰
吾恐季孫之憂不在顓臾且北狄尚強而屯田警備傳
聞之事常多失實誠能舉天下之兵以滅大寇豈非至
願苟非其時不如息人自是諸將莫敢復言兵事者

魏文帝討孫權臨江而還詔三公曰三世為將道家所
忌窮兵黷武古有成戒况連年水旱士民損耗而功作
倍於前勞役兼於昔進不滅賊退不和民夫漏屋在上
知之在下然迷而知反失道不遠過而能改謂之不過

今將休息棲備高山沈權九淵割除擯棄投之畫外車
駕當以今月中旬到譙淮漢衆軍亦各還反不獵西歸
矣

隋高祖開皇元年正月丙子陳國平四月壬戌詔曰往
以吳越之野羣黎塗炭干戈方用積習未寧今率士夫
同含生遂性太平之法方可流行凡我臣僚澡身浴德
開通耳目宜從茲始喪亂已來緬將十載君無君德臣
失臣道父有不慈子有不孝兄弟之情或薄夫婦之義

或違長幼失序尊卑錯亂朕為帝王志在愛養時有臻道不敢寧息內外職位遐邇黎民家家自修人人克念使不軌不法蕩然俱除兵可立威不可不戢刑可助化不可專行禁衛九重之餘鎮守四方之外戎旅軍器皆宜停罷代路既夷羣方無事武力之子俱可學文人間甲仗悉皆除毀

唐太宗貞觀十五年八月職方郎中陳大德使高麗迴言於帝曰其國聞高昌之滅大懷震懼大德封盧三至

館候五接之禮加於常數太宗曰高麗所居本四郡發卒數萬攻遼東諸城其國精兵必來救援又遣舟師自東萊橫海以趣平壤水陸合勢此固取之不難但關東諸州戶口未復朕意在含育不欲勞之耳

十六年十一月亳州刺史裴思莊奏請伐高麗帝曰高麗附庸之主朝貢不絕聞有篡弑哀之甚深因喪致討乘危取亂雖必得之君子不貴且復山東諸州凋弊未復吾不忍發言舉兵耳

高宗龍朔三年八月御內殿謂侍臣曰比為海東負釁
須申弔伐是數年已來頻有勞役所在百姓誠大辛苦
况緣軍機調發科喚百端貪殘之徒恣意侵暴兼復造
船諸州辛苦更甚前令借問真欲知其事實然四方便
至略不盡言表疏所陳皆涉順旨我密加廉察在下非
無怨咨如聞隋朝破亡緣為征役不息隋亡何必不繇
此相傳其有此議且越海行兵備經難阻或斃鋒刃或
遭沉溺追想非命有悼於懷昔漢武帝征伐四夷戶口

哀減晚年感悟封丞相為富民侯此即故事分明足為
龜鏡前令三十六州造船舫者今欲總停使遠近百姓
無役豈不善邪即日下詔曰朕以寡昧纂承鴻業肅宸
巖廊之上凝襟華裔之表馭奔深於日慎儲祉存於勿
休勉已勵精詳求大化往為奉成先志雪恥黎元是以
數年之間稱兵遼海雖除凶戡暴義匪諸身疲人竭財
役興於下泛滄流而遐濟踐危途而遠襲風之競海或
取淪亡鋒鏑交揮非有捐介顧惟匪德事有乖於七旬

在躬延責情致慙於四海湯年罪已鑿寐斯在漢載富人周旋切念日者翹車聯映賁帛相輝庀鼎之前猶潛秀異關柝之下未盡英奇傳逸翰於西雍物殊寶於東序此王師薦發戎務實繁州縣官僚緣茲生過力役無度賄賂公行蠹政傷風莫斯為甚前令三十六州造船已備東行者即宜並停凡百在位宜極言得失悉無隱以救不逮

玄宗開元二年十月薛訥引兵至源渭遇吐蕃戰擊克

捷帝遂停親征乙丑勅曰犬戎背恩豕荐為孽犯塞侵
牧乘洮涉渭朕託王公之上居司牧之尊憫彼蒼生情
動整旅戒嚴有日先命偏師前驅進討扼喉拊背拉朽
推枯今諸將追奔相望獻捷遁逃已來邊鄙方寧夫出
師天上觀兵塞下所以用威武也念人勞斃與人休息
所以暢恩惠也彼戎狄之為患必在誅夷苟黎元之獲
安寧資順動况去有徒費追無所及兼懷供帳之勞宜
輟共行之典前取本月十二日親征者宜停

二十五年六月勅曰今邊隅無事寰宇乂安向內置烽誠則非要其蒲絳等二十二州置絳師等共一萬八千九十八人宜並停勒還本邑

代宗廣德二年二月制應諸州團練將士等委本道節度及都防禦使等審與州府商議如地非要害無所防虞其團練人等並放營農休息

六月勅曰國中有事海內不康殲厥渠魁人自為戰其死亡者可勝紀乎非其父兄即其子弟責實繇朕禍非

自天念茲恟恟痛入骨髓明神散亂元惡就誅四胡既
平固不相賀遂欲衣裳為國天下偃兵備七德之武同
五星之色成朕之志實惟良臣關內侯東副元帥朔方
河東節度使兼侍中中書令汾陽郡王子儀邁德濟時
盡忠憂國切勤王之義急偃伯之期思拯生人免其湯
火善陳利害屢進封章以艱阻底寧務於清靜地非要
害不可猶聞幕府事無防遏不可更置轅門請停河中
節度并耀德軍宜依罷茲凶器姑欲息人離散可要瘡

疾可復率是道也仁遠乎哉朕心所嘉期于至理宣示中外明政體焉

大正五年正月罷河南淮西淮南山南東道副元帥其所管兵馬權隸東都留守時四方無虞務息人也

憲宗元和十二年十一月淮西平御史中丞崔元略論侍御史唐武當改官帝曰人之取名多矣何必武為曩時蔣武已請改矣遂改唐武為慶時議者見淮西初平謂帝遂喜武功及見改唐武名乃知帝厭兵人人相賀

和好

自建安以來三國鼎分當塗外禪吳蜀競爽及西晉喪
亂五胡僭竊瑯琊南度司牧遺黎其後元魏勃興上承
正統諸國迭主分據中原秣陵更乎五朝華夏禪于三
姓附之高齊載於二百當其繕兵鬪力傳世撫封疆理
交侵干戈迭用及夫天將悔禍民思息肩繇是冠蓋相
望玉帛修聘咸築待賓之館相高專對之能遂使烽鼓
稍停耕桑漸復免罹鋒鏑之苦少救塗炭之災邇後雖

興取亂之師亦行繼絕之禮遵用古道良足稱焉

魏文帝黃初二年八月吳孫權遣使奉章并遣于禁等還丁巳使太常邢貞持節拜孫權為大將軍封吳王加九錫帝又欲封權子登年幼上書辭封重遣西曹掾沈珩陳謝并獻方物

三年正月吳孫權上書說劉備友黨四萬人馬二三千匹出秭歸請往掃撲以克捷為效帝報曰昔隗囂之弊禍發拘邑子陽之擒變起扞關將軍其亢勵威武勉蹈

奇功以稱吾意

又云帝以素書所著典論及詩賦餉權又以紙寫一通與張昭

晉武帝泰始二年吳少帝孫皓遣人來弔祭有司奏為答詔帝曰昔漢文光武懷撫尉陀公孫述皆未正君臣之儀所以羈縻來賓也皓遣使之始未知國慶但以書答之

後魏道武天興三年五月詔謁者僕射張濟使於後秦姚興

六年冬十月晉遣使來聘

明元神瑞元年八月詔馬邑侯元陋孫使聘於姚興又詔平南將軍相州刺史尉太真與晉太尉劉裕相聞使博士王諒假為平南叅軍將命焉後劉裕伐姚泓詔長孫嵩持節督山東諸軍事傳詣平原緣河北岸列軍次於畔城軍頗失利詔假裕道裕於舟中望嵩麾蓋遺以酈酒及江南食物嵩皆送京師詔嵩厚答之

泰常六年宋遣使來聘

太武始光二年四月詔龍驤將軍步趨謁者僕射胡覲

使於宋

三年八月宋遣使來聘

四年四月詔員外散騎常侍步趨謁者僕射胡覲等使於宋

神麌二年四月宋遣使來聘

四年六月詔散騎侍郎周紹使於宋

延和元年五月宋遣使來聘

六月詔兼散騎常侍鄧頴使於宋

二年二月詔兼散騎常侍宋宣使於宋

九月宋遣使朝貢奉馴象一

十二月詔兼散騎常侍盧玄使於宋

太延二年三月宋遣使朝貢

七月詔散騎侍郎廣平子游雅等使於宋

二年三月宋遣使來聘

四年十二月詔兼散騎常侍高推使於宋

五年十一月宋遣使朝貢并獻馴象一

太平真君元年二月詔假通直常侍邢穎使於宋

二年四月宋人來聘

八月詔散騎侍郎張律使於宋

十二月宋人來聘

五年八月詔員外散騎常侍高濟使於宋

十一月宋人來聘

六年正月詔兼員外散騎常侍宋愔使於宋

九年正月宋人來聘

十一年十二月南伐車駕臨江宋文帝使獻白牢貢其方物又請進女於皇孫為書致馬通問焉

正元元年十月宋人來聘詔殿中將軍郎法祐使於宋文成和平元年正月詔散騎侍郎馮闡使於宋

七月宋遣使朝貢

十一月詔散騎侍郎盧度世員外郎朱安興使於宋

二年三月宋遣使朝貢

十一月詔假員外散騎常侍游明根員外郎昌邑侯和

天德使於宋

三年三月宋遣使朝貢

十月詔員外散騎常侍游明根員外郎昌邑侯和天德使於宋

四年十月詔員外散騎常侍游明根驍騎將軍昌邑子婁內近寧朔將軍襄平子李五麟使於宋

獻文皇興元年正月癸巳宋遣使來聘

宋明帝也

二年三月戊午宋遣使來聘

三年四月壬辰宋遣使來聘

四年六月宋遣使來聘

孝文延興元年八月宋遣使來聘

二年正月詔假員外郎散騎常侍邢祐使於宋

四年宋遣使來聘

是月宋明帝
子後廢帝立

三年正月詔員外散騎常侍崔演使於宋

九月宋遣使來聘

四年三月詔員外散騎常侍許赤虎使於宋

十一月宋遣使來聘

五年五月詔員外散騎常侍許赤虎使於宋

十一月宋遣使來聘

太和元年八月宋遣使朝貢

是年七月宋順帝嗣位

十一月詔員外散騎常侍李長仁使於宋

二年四月宋遣使朝貢

十月詔員外散騎常侍鄭義使於宋

三年四月宋遣使來聘

是年宋順帝為齊高祖所廢

五年秋七月齊遣使來聘

七年七月詔假員外散騎常侍李彪員外郎蘭英使於

齊

齊武
帝也

十一月齊遣使來聘

八年五月詔員外散騎常侍李彪員外郎蘭英使於齊

九月齊遣使來聘

十一月詔員外散騎常侍李彪員外郎蘭英使於齊

九年五月齊遣使朝貢

十月復詔員外散騎常侍李彪尚書郎公孫阿六頭使於齊

十年三月齊遣使來聘

十三年八月詔兼員外散騎常侍邢產兼員外散騎侍郎侯靈紹使於齊

十二月齊遣使來聘

十四年四月詔兼員外散騎常侍邢產兼員外散騎侍郎蕪季連使於齊

十一月齊遣使來聘

十五年四月詔員外散騎常侍李彪尚書郎公孫六頭

使於齊

九月齊遣使來聘

十一月詔假通直散騎常侍李彪假散騎侍郎蔣少游

使於齊

十六年三月齊遣使朝貢

七月詔兼員外散騎常侍宋弁兼員外散騎侍郎房亮

使於齊

十二月齊遣使來聘

十七年正月詔兼員外散騎常侍邢巒兼員外散騎侍郎劉家叔使於齊

九月詔兼員外散騎常侍高聰兼員外散騎侍郎賈禎使於齊時帝定都雒陽追詔聰等曰比於雒陽勅卿仍屆瀍雒周視舊業依然有懷固欲先之後乃薄伐且以蕭頤喪甫爾使通在昔乘危幸凶君子弗取是用輟茲

前圖遠期來會爰思六師三川是宅將底居成周永恢
皇宇今更造璽書以代往詔比所勅較隨宜變之善勛
皇華無替指意

十八年二月齊遣使來聘

六月詔兼員外散騎常侍盧昶兼員外散騎侍郎王清

石使於齊

七月齊鬱林王為明帝所殺立弟昭
文是為海陵王十月又殺昭文自立

十二月車駕南伐遂絕齊和好初梁武帝屢侵魏邊豫
州城人成早生以城歸之詔遣中書舍人董紹慰勞紹

至上蔡為梁軍所襲囚往江東仍被禁錮領軍將軍呂
僧珍斲與紹言便相器重梁武聞之遣使勞紹云忠臣
孝子不可無之今當聽卿還國紹對曰老母在雒無復
方寸既奉恩貸實若更生梁武又遣主書霍靈秀傳詔
曰今放卿還令卿通兩家之好彼此息民豈不善也對
曰通好息民乃兩國之事既蒙命及輒當聞奏本朝梁
武賜紹衣物引入見之令其舍人周捨慰勞并稱戰爭
多年民物塗炭是以不恥先言與魏朝通好比亦有書

都無報旨卿宜備申此意故遣傳詔霍靈秀送卿還國
遲有嘉問又令謂紹曰卿知所以得不死否今者獲卿
乃天意也夫千人之聚不散則亂故須立君以治天下
不以天下養一人凡在民上胡不思此若欲通好今以
宿豫還彼彼當以漢中見歸先是詔有司以所獲齊將
齊狗兒等二人欲以換紹及紹還宣武愆之永平中除
給事中仍兼舍人紹雖陳說和計朝廷不許

後周高祖武帝保定元年六月遣治御正殷不害等使

於齊

十二月陳遣使來聘

二年正月以陳主弟頊為柱國送還江南

九月陳遣使來聘

三年七月陳遣使來聘

十月陳遣使來聘

四年九月陳遣使來聘

五年十一月陳遣使來聘

天和三年八月齊請和親遣使來聘詔軍司馬暹兵部
尹公正報聘焉

十一月遣開府崔彥小賓部元暉使於齊時韋孝寬為
驃騎大將軍鎮玉壁齊人遣使至玉壁求通好而晉公
護以其相持日久絕無使命一日忽來求交易疑別有
故又以皇姑皇世母先捉在彼因其請和之際或可致
之遂令司門下大夫尹公正至玉壁共孝寬詳議孝寬
乃於彼盛設供帳令公正接對使人魚述皇家親屬在

東之意使者辭色甚悅時又有汾州胡抄得關東人孝
寬復放東還并致書一牘具陳朝廷欲敦隣好齊遂以
禮送皇姑及護母等先是護母閭姬與皇第四姑及諸
戚先沒在齊皆被幽繫護為宰相之後每遣間行尋求
莫知消息至是並許還朝且請和好四年皇姑先至齊
主以護既當重權乃留其母以為後圖仍令人為書與
護曰天地隔塞母子異所三十餘年存亡斷絕肝腸之
痛不能自勝想汝悲思之懷復何可處吾自念十九入

汝家今已八十矣凡生汝輩三男三女今日目下不覩
一人興言及此悲纏肌骨賴皇齊恩恤差安哀暮又得
汝楊氏姑及女嫂劉及汝新婦等同居頗亦自適但為
微有耳疾大語方間行動飲食幸無多損今大齊聖德
遠被特降鴻慈既許歸吾於汝又聽先致音耗積稔長
悲豁然獲展此乃上侔造化將何報德汝與吾別之時
年尚幼小以前家事或不委曲昔在武川鎮生汝兄弟
大者屬鼠第二者屬兔汝身屬蛇鮮于修禮起日合家

大小先在博陵郡住相將欲向左人城行至唐河北被
定州官軍打散汝祖及第二叔時俱戰亡汝叔母賀拔
及兒元寶汝叔母紇干及兒菩提并吾與汝六人同被
擒捉入定州城未幾間將吾及汝送與元寶掌賀拔紇
干各州分散寶掌軍營在唐城內經停三日寶掌所掠
得男人婦女可六七十人悉送向京吾時與汝同被送
限至定州城南夜宿鄉人姬庫根家茹茹奴望見鮮于
修禮營大語吾云我今走向今軍既至營遂告我輩在

此明旦日出汝叔將兵要截吾及汝等還得向營汝年
十二共吾並乘馬隨軍可不記此因緣也於後吾共汝
在壽陽住時元寶菩提及汝姑兒賀蘭盛雒並汝身四
人同學博士姓成為人嚴惡汝等四人謀欲加害吾共
汝叔母聞知各捉其兒打之唯盛雒無母獨不被打其
後爾朱天性亡歲賀拔阿計泥在關西遣人迎家累時
汝叔亦遣奴來富迎女并盛雒等汝時著緋綾袍銀裝
帶盛雒著紫織成襖通身黃綾裏並乘騾同去盛雒小

於汝等二人並喚吾作阿摩敦如此之事汝當分明記
之耳今又寄汝小時所著錦袍表一領至宜簡省知吾
含悲抱感多歷年祀屬千載之運逢大齊之德矜老開
恩許得相見一聞此言死猶不朽况如今者勢必聚集
禽獸草木母子相依吾有何罪與汝分隔今復何福還
望見汝言此悲喜死而更蘓世間所求皆可得母子異
國何處可求假汝貴極王公富過山海有一老母八十
之年飄然千里死亡旦夕不得一朝相見不得一日同

處寒不得汝衣饑不得汝食汝雖窮貴極盛光耀世間
汝何用為於吾何益今日之前汝既不得申其供養事
往何論今日已後吾之殘命唯繫於汝耳戴天履地中
有鬼神勿云冥昧而可欺負楊氏姑今雖炎暑猶能先
發關河阻遠隔絕多年書依嘗體慮汝致惑是以每存
款質兼亦載吾姓名當識此理不以為恠護性至孝得
書悲不自勝左右莫能仰視報以書曰區宇分隸遭逢
災禍違離膝下二十五年受形稟氣皆知母子誰同薩

實如此不孝宿殃積戾合鍾此身豈悟網羅上嬰慈母
但立身立行不負一物明神有識宜見哀憐而子為公
侯母為俘隸熱不見母熱寒不見母寒衣不知有無食
不知饑飽泯如天地之外無由覩聞晝夜悲號繼之以
血分懷冤酷終此一生死若有知異奉見於泉下耳不
謂齊朝鮮網惠以德音摩敦四姑並許歸放初聞此旨
魂魄爽飛號天叩地不能自勝四姑即蒙禮送平安入
境遙奉顏色摧動肝腸但離絕多年存亡阻隔相見之

始口未忍言惟叙齊朝寬宏每存大德云與摩敦雖處
宮禁嘗蒙優禮摩敦垂勅曲盡悲酷備述家事伏讀未
周心情屠割書中所道無一事敢忘摩敦年尊又加憂
苦常謂寢膳貶損或多遺漏伏奉論述次第分明一則
以悲一則以喜當鄉里敗破之初薩寶年已十歲隣曲
舊事猶自記憶况家門禍難親戚流離奉辭時節先後
慈訓刻肌刻骨常纏心腑天長喪亂四海橫流太祖乘
時齊朝撫運兩河三輔各值神機原其事迹非相負背

太祖升遐未定天保薩寶屬當猶子之長親受顧命雖
身居重任職當優貴至於歲時稱慶子孫盈庭顧視悲
摧心情斷絕胡顏戴視負愧神明齊朝沛然之恩既已
霑洽愛敬之至施及旁人草木有心禽魚感澤況在人
倫而不銘戴有國有家信義為本伏度來期已應有日
得奉見慈顏永畢至願生死骨肉豈過今恩負山戴嶽
未足勝荷二國分隔理無書信主上以彼朝不絕母子
之恩亦賜奉答不期今日得道家問伏紙鳴咽言不宣

心蒙寄薩寶別時所留錦袍表年歲雖久宛然猶識抱
此悲泣至於拜見事歸忍此知復何心齊朝不即發遣
更令重與護書要護重報護復書往返至于再三而母
竟不至朝議以失期信令有司移齊曰夫有義則存無
信不立山嶽猶輕兵食非重故立誓弗違重耳所以享
國祝史無愧隨會所以為盟未有司牧生民君臨有國
可以忘義而多食言者也自數屬屯夷時鍾圮隔皇家
親戚淪陷三紀仁姑世母望絕生還彼朝以去夏之初

德音爰發已送仁姑許歸世母乃稱煩暑指克來秋謂
其信必由衷嘉言無爽今落木戒時申霜行及方為世
母虛設說辭未議言歸更徵酬答子女玉帛既非所須
保境寧民又云匪報詳觀此意全乖本懷愛人以禮豈
惟姑息要子責成貿親求報實傷和氣有悖天經我之
周室太祖之天下也焉可捐國顧家殉名虧實不害所
養其曰仁人卧鼓潛鋒孰非深計若令迭爭尺寸兩競
錐刀瓦震長平則趙分為二兵出函谷則韓列為三安

得獨全謂無損益大家宰位隆將相悼兼家國銜悲茹
血分畢寃魂豈意噬指可尋倚門應至徒聞善始卒無
令終百辟震驚三軍憤惋不為孝子當作忠臣去歲北
軍深入數俘城下雖曰班師餘功未遂今茲馬首南向
更期重入晉人再之我之職矣聞諸道路早已戒嚴非
直北拒又將南略儻欲自送此之願也如或嬰城未能
求敵詰朝請見相與周旋為惠不終徒增深怨愛親無
慢垂訓尼父矜恤窮獨貽則周文環玦之義事不繇此

自應內省豈宜有問移書未送而母至

四年正月遣司會河陽公李倫等會葬於齊仍弔賻焉
五月齊遣使來聘

六年五月遣納言鄭詡使於齊

十月遣右武伯谷會珉御正蔡斌使於齊

十一月齊遣使來聘

建德元年二月遣司宗李祭小賓部賀遂禮使於齊

三月齊遣使來聘

四月遣工部成公建小禮部辛彥之使於齊

七月陳遣使來聘

十一月遣小匠師楊勰齊馭唐則使於齊

二年閏正月陳遣使來聘

二月遣司會侯莫陳凱太子宮尹鄭譯使於齊

九月陳遣使來聘

十月齊遣使來聘

三年四月齊遣使來會皇太后葬

十月詔御正楊尚希禮部盧愷使於陳

四年三月遣小司寇淮南公元偉治納言伊婁謙使於

齊

七月陳遣使來聘

五年八月陳遣使來聘

十二月陳遣使來聘

六年五月陳遣使來聘是歲帝既平北齊後梁明帝蕭
歸朝於鄴帝雖以禮接之然未之重也歸知之後於宴

承間乃傳其父荷太祖拯救之恩并叙二國艱虞唇齒
犄角之事辭理辯暢因涕泗交流帝亦為之歔歔自是
大加賞異禮遇日隆後帝復與之宴齊氏故臣叱列長
義亦預焉帝指謂歸曰是登陴罵朕者也歸曰長義未
抱樂翻敢吠堯帝大笑及酒酣又命琵琶自彈之仍謂
歸曰當為梁主盡歡歸乃起請舞帝曰梁王乃能為朕
舞乎歸曰陛下既親撫五絃臣何敢不同百獸帝大悅
賜雜繒萬段良馬數十匹并賜齊後主妓妾及帝所乘

五百里駿馬以遣之

宣帝大象元年九月遣御正杜果禮部薛舒使於陳

隋高祖開皇元年二月丁未梁主蕭歸使其太宰蕭巖
司空劉義來賀

四月陳遣散騎常侍韋鼎魚通直散騎常侍王瑳來聘
於周而帝已受周禪致之介國

二年正月陳遣使請和歸赦胡墅

三年四月陳郢州城主張子譏遣使請降帝以和好不

納遣兼散騎常侍薛舒兼通直散騎常侍王邵使於陳
十二月陳遣散騎常侍周墳通侍散騎常侍袁彥來聘
閏月遣兼散騎常侍唐令則通侍散騎常侍魏澹使於

陳

四年正月梁明帝蕭巋來朝

初帝在周執政時尉遲迥王謙司馬消難等各起兵

時巋羣臣皆密請與師與迥等為連衡之勢進可以盡節於周氏退可以席捲山南巋固以為不可成而消難奔陳迥等相次破滅及帝既踐極恩禮彌厚遣使賜金五百兩銀千兩布帛萬疋馬五百疋開皇二年帝備禮納巋女為晉王妃又欲以其子陽尚蘭陵公主繇是罷江陵總管巋專制其國至是來朝長安帝甚敬待之設

歸位在王公之上賜緜萬疋珍玩稱是及還親執其手
謂之曰梁主久帶荆楚未復舊都故鄉之念長軫懷抱
朕當振旅長江
相送旋反耳

七月陳遣兼散騎常侍謝白兼通直散騎常侍賀德基
來聘

十一月遣兼散騎常侍薛道衡通直散騎常侍豆盧寶
使於陳

五年七月陳遣兼散騎常侍王詒兼通直散騎常侍阮
卓來聘

九月遣散騎常侍李若通直散騎常侍崔君瞻使於陳
六年四月陳遣兼散騎常侍江椿來聘

八月陳遣散騎常侍王亨兼通直散騎常侍王春來聘
七年二月陳遣兼散騎常侍裴豪兼通直散騎常侍劉
顛來聘

四月遣兼散騎常侍楊同兼通直散騎常侍崔儼使於
陳

八年正月陳遣散騎常侍袁雅兼通直散騎常侍周止

水來聘

二月甲戌遣兼散騎常侍何尚賢兼通直散騎常侍韋
軍使於陳

冊府元龜卷一百四十二